




Ciet Nguxnyied Co'ngux Homfwdfwd

香 飘 飘 的 端 午 节

Meggangj henjcug, vavuengzgae haih va, rongfaengx fat ok gij heiq homfwd, daxmeh haetromh couh dawz diuz sai haj saek laenz ndei haenx cug youq hozfwngz gou, couh yienghneix, gou youh coux daeuj aen ciet nguxnyied co'ngux homfwd diemzsi he.

Nguxnyied co'ngux dwg aen ciet conzdungj guek raeuz he, daengz seizneix gaenq miz song cienz lai bi lizsij lo. Gij goekgaen de dwg youq mwh Cincou Cangoz, hainduj dwg caeq boux Gizyenz hamzhaemz diuq roengz

Dahmilozyangh bae dai haenx. Ging-gvaq gejlai aen cinhah coudoeng, ciet nguxnyied co'ngux youq ndaw haujlai ciet conzdungj ndaej baujlouz roengz-daeuj lo. De mbouj dandan dwg aen ciet he, engq dwg cungj cingsaenz Cunghvaz minzcuz he.

Moix bi daengz ngoenz nguxnyied co'ngux, ceiq nauhyied couh dwg suek faengx. Gou ceiq gyaiez yawj daxmeh suek faengx lo, daxmeh sien dwg dawz rongfaengx swiq ndaej seuqsatsat, yienzhaeuh fwngzswix dawz rongfaengx, fwngzgvaz daek haeuxcid cuengq roengz rongfaengx bae, caiq gya di duh roxnaeuz noh, suek gij faengx miz aen sangak miz aen raez. Cuengq roengz gu bae cawj, cawj ok gij feih daengx ranz cungj

hom. Gij faengx ngamq cawj cug haenx ndat fwdfwd, gou dawz daeuj gwn, unqnemnem, homfwftwt, caen ndei gwn ha!

Gij fungsug ciet nguxnyied co'ngux gak dieg mbouj doxdoengz, miz mbangj dieg vad ruzlungz doxdax, bihaenx gou caeuq daxboh bae yawj ruzlungz doxdax, gizde vunz lai vunz daih, gou caeuq daxboh feiq haujlai rengz caenx haeuj geh vunz bae, yawjraen ndaw dah miz caet bet aen ruzlungz, aen gyauejruz dwg gyauej-lungz, gyauejruz cingq ngiengx aen-gyauej caj doxdax hainduj. Ndwun youq gyauejruz dwg bouxroqgyong, youq riengruz dwg bouxgaemdox, cungqgyang cibgeij boux vunz gaem fagcauh, lumj hawj ruzlungz an hwnj

gaiqfwd nei. Mwh bouxcaizbuenq roengzlingh, sojmiz gij ruz couh doxcaez cung okbae, lumj fagnaq lizhai aengung nei bongh baefwdfwd. Gwnz ruz henz hamq, singgyong yiengjhumhum, boux vad ruz riengz singgyong haenqrengz vad baenaj.....

Dingqgangj miz mbangj dieg youq ngoenz nguxnyied co'ngux, gyoengqvunz yaek raek daehywhom, gwn laeujhenj, dieg gou dwg lwgnyez hozfwngz cug saihajsaek, bakdou baek go'ngaih, dingqgangj dwg ndaej gyaep fangz ndoj rwix.

Gyonj daeuj gangj, moix aen ciet cungj miz aen goj ndeidingq he caeuq aen conzdungj cigndaej raeuz bae swnj he ba.

(roek nienzgaep Ya Lungzyij)

Gejlai Cienz Gaen Ndeu

多少钱一斤

Buj Sunghlingz gig miz dungxcaiz, hoeng mbouj deng yawjnaek, miz duenh seizgan he, de cij ndei baengh sonsaw gvaq saedcej.

Miz ngoenz ndeu, de cingq hawj hagseng hwnjdangz, miz boux gai makleiz he daj bakdou byaij gvaq, heuh naeuz: "Gai makleiz, makleiz youh hung youh van!"

Buj Sunghlingz raen hagseng deng sing gai mak yinx bae, couh naeuz: "Gij makleiz neix gejlai cienz gaen ndeu? Daihgya sij youq gwnz ceij gyau hwnjdaej."


Miz mbangj hagseng sij sam maenz cienz, miz mbangj sij seiq maenz cienz, miz mbangj sij haj maenz cienz.....

Buj Sunghlingz yawj dapgienj itcig ngauz gyauej. Doeklaeng, de yawjraen miz mbaw ceij he gwnz de sij "it bak roekcib cienz gaen ndeu" seiz, naj de riu lo, lienzlienx ngaek gyauej.

Boux gai makleiz mbouj naeuz makleiz gejlai cienz gaen, yienghneix Buj Sunghlingz vihmaz nyinhnaeuz "it bak roekcib cienz gaen ndeu" dwg deng ne?

Laxlawz, "cienz" hix dwg cizlieng danhvei, cib cienz ndaej daengj liengx he. Youq mwh Cingciuz, gaen ndeu couh dwg cibroek liengx, ndigah gaen ndeu couh daengj it bak roekcib cienz.

(Vangz Gvan)



"Lauxbanj, caiq noix di, ndaej mbouj ndaej?" "Gyaq-cienz neix gaenq dwg ceiq daemq lo, mbouj ndaej caiq noix lo, gaeuq bienzgeiz lo." Youq aen bouq gai buhvaq he, daxmeh cingq caeuq lauxbanj ganggyaq.

Ngoenzneix cingq dwg ngoenzsinghiz, daxmeh naeuz yaek cawx buh moq hawj gou. Loh gvaq aen bouq gai buhvaq vunzhung he cingq dajciet, daxmeh rag gou haeujbae yawj-yawj.

Buh ndaw bouq saek miz di ndaem, mbouj hab daxmeh daenj, genj le haujlai nanz,

Cawx Buhvaq

买衣服

daxmeh dauqdaej genj ndaej geu buh habhoz de lo. De sik-haek caeuq cawjbouq ganggyaq, hoeng doeklaeng cawjbouq mbouj haengi noix saek faen. Daxmeh rag dawz gou naeuz: "Gyahgyah, byaij, bae cawx buh mwngz."

Neix dwg aen bouq gai buhvaq lwgnyez mingzbaiz he, gyaqcienz gig bengz. Daxmeh hawj gou gag bae genj. Gou yawj bae yawj dauq, doeklaeng yawj hwnj diuz vaq niuzcaijgu gya yungz he, saek lamzoiq, gavaq miz baiz cihmeh he daeuj cang, gig ndei yawj.

Gou haeuj ndaw rug sawq buhvaq bae daenj geu vaq neix hwnj ndang, raeujrubrub, caen cwxcaih. Yawjyawj ndaw gingq, youh hab ndang youh ndei yawj. Gou daenj hwnj ndang le couh

mbouj siengj duet roengzdaej lo.

Daxmeh raen gou gyaiez diuz vaq neix, couh bae gyau cienz. Diuz vaq neix bak maenz ngaenz bw, daxmeh cix mbouj yaemhywx saek di couh gyau cienz lo.

Youq gwnz loh ma ranz, siengj hwnj gij cingzhangz daxmeh caeuq cawjbouq ganggyaq, ndaeng gou baez soemj, gingqyienz miz di siengj daej lo. Daxmeh vih gou cawx le geij geu buhvaq gyaqcienz haemq bengz haenx, hoeng swheij lienz geu buh dajciet he cungj mbouj sij ndaej cawx.

Gij gyaiez daxmeh gizgiz cungj miz, cijaeu mwngz louzsim cazyawj, couh yawj ndaej raen daxmeh seizseiz cungj gyaiez mwngz.

(roek nienzgaep Yungz Gyahgyah)

Gou Ceiq Gyaiez Daxboh

我最喜欢爸爸

Boux vunz gou ceiq gyaiez haenx dwg daxboh.

Daxboh gig gaenx. Dingzlai ranz hongranz cungj dwg daxmeh guh, ranz gou cix dwg daxboh guh lai. Daxboh moix baez roengzban dauqma, couh cawjdoengh guh hongranz, lumj cawj haeux cawj byaek, uet congheueg uet daiz. Moix baez gwn haeux le, de couh ciengj bae swiq vanj, gij haiz caeuq mad de mbouj hawj daxmeh saeg gvaq.

Daxboh cingdoeng den-

nauj. Dennauj doengzsaeh ndaw danhvei caeuq dennauj ndaw ranz baengzyoux vaih le, cijaeu dwk dienhvah hawj daxboh, de couh sikhaek ganj bae coih. Miz baez ndeu, ndaw siujgih dou miz ranz he dennauj vaih lo, bohmei caengz dauqma ranz, boux lwgnyez cib bi caeuq daxgoeng de youq rog siujgih gip dwk caj bohmei lwgnyez dauqma. Gij cingzgingj neix deng daxboh yawjraen lo, de sikhaek hwnjbae cam dwg maz cingzgvang. Dax-

goeng naeuz: "Dennauj ndaw ranz vaih lo, lwgnyez lij miz cozyez gwnz vangj yaek guh ne!" Daxboh sikhaek heuh daxgoeng daiq loh, daengz ranz de baez yawj, laxlawz dwg dennauj deng binghdoeg lo. Aenvih dennauj ranz daxgoeng deng binghdoeg daiq youqgaenj, daxboh cij ndei dauq cang hidungj hawj de. Dennauj coih ndei le, daxboh lij louz dienhvah hawj hawj daxgoeng, naeuz: "Baezlaeng dennauj vaih le, couh daeuj ra gou!"

Neix couh dwg daxboh gou ceiq gyaiez haenx—boux vunz swnhsienh gaenxguh, gyaiez bang vunz he.

(haj nienzgaep Ciz Feih-siengz)